



52

苑詩類選卷之十四

明監察御史包節輯按察司知事前給事中王交校

樂府部四

長相思

徐陵

長相思望歸難傳聞奉詔戍臯蘭龍城遠鴈門寒秋來
瘦轉劇衣帶徒自寬

又

蘇頌

君不見天津橋下東流水南望龍門北朝市楊柳青青
宛地垂桃紅李白花參差花參差柳堪結此時憶君心
斷絕

又

權德輿

少小別潘郎，嬌羞倚畫堂。有時裁尺素，無事約殘黃。鵲語臨粧鏡，花開落繡牀。相思不解說，明月照空房。

又二首

令狐楚

君行登隴上，妾夢在閨中。玉箸千行落，銀牀一半空。

其二

綺席春眠覺，紗窗曉望迷。朦朧殘夢裏，猶自到遼西。

有所思

王融

如何有所思，而無相見時。宿昔夢顏色，階庭尋履綦。高張更何已，引滿終自持。欲知憂能老，為視鏡中絲。

又

梁簡文帝

昔未離長信，金翠奉乘輿。何言人事異，宿昔故恩疎。寂寞錦筵靜，玲瓏玉殿虛。掩閨泣團扇，羅幌詠薜蘿。

又

庾肩吾

佳期杳不歸，春日坐芳菲。拂匣看離扇，開箱見別衣。井梧生未合，宮槐卷復稀。不及銜泥燕，從來相逐飛。

又

陳後主

佳人在北燕，相望渭橋邊。團團落日樹，耿耿曙河天。愁多明月下，淚盡鴈行前。別心不可寄，惟餘琴上絃。

又

張正見

深閨久離別積怨轉生愁徒思裂帛鴈空上望歸樓看
花憶塞草對月想邊秋

又

陸系

別念恨城闈還思樓上人淚想離前落愁聞別後新月
來疑舞扇花度憶歌塵只看今夜裏那是隔河津

又

楊炯

賤妾畱南楚征夫向北燕三秋方一日少別比千年不
掩頻紅縷無論數綠錢相思明月夜迢遞白雲天

又

韋應物

借問江上柳青青為誰春空遊昨日地不見昨日人綠

繞萬家井往來車馬塵莫道無相識要非心所親

佳期竟不歸

張正見

良人萬里向河源倡婦三秋思柳園路遠寄詩空織錦
宵長夢返欲驚魂飛蛾屢繞帷前燭衰草還侵堦上玉
銜啼拂鏡不成粧促柱繁絃還亂曲時分年移竟不歸
偏憎寒急夜縫衣流螢映月明空帳疎葉從風入斷機
自對孤鸞向影絕終無一鴈帶書飛

古離別

王適

昔歲驚楊柳高樓悲獨守今年芳樹枝孤棲怨別離珠
簾晝不卷羅幔曉長垂苦調琴先覺愁容鏡獨知頻年

鴈去無消息罷却鸞紋何用織夜還羅帳空有情春着
裙腰自無力青軒桃李落紛紛紫庭蘭蕙自氛氲已能
憔悴今如此更復含情一待君

相逢行

崔顥

妾年初二八家住洛橋頭玉戶臨馳道朱門近御溝使
君何假問夫婿大長秋女弟新承寵諸兄近拜侯春生
百子殿花發五城樓出入千門裏年年樂未休

對酒

張正見

當歌對玉酒匡坐酌金壘竹葉三清泛蒲萄百味開風
移蘭氣入月逐桂香來獨有劉將阮忘情寄羽杯

又

岑敬之

色映臨池竹香浮滿砌蘭舒文泛玉盃漾蟻溢金盤簫
曲隨鷺易笳聲出塞難唯有將軍酒川上可除寒

又

王勃

投簪下山閣携酒對河梁狹水牽長鏡高花送斷香繁
鶯歌似曲踈蝶舞成行自然催一醉非但閱年光

又巴陵作

張說

畱侯封萬戶園令壽千金本為成王業初由賦上林繁
華安足恃霜露遞相尋鳥哭楚山外猿啼湘水陰夢中
城闕近天畔海雲深空對忘憂酒離憂不去心

短歌行

辛德源

馳射罷金溝戲笑上雲樓少妻鳴趙瑟侍妓轉吳謳杯
度淨香滿扇舉細塵浮星河耿涼夜飛月艷新秋忽念
奔駒促彌欣執燭遊

釣竿篇

張正見

結宇長江側垂釣廣川潯竹竿橫翡翠桂髓擲黃金人
來水鳥沒檝渡岸花沉蓮搖見魚近綸盡覺潭深渭水
終湏卜滄浪徒自吟空嗟芳餌下獨見有貪心

又

李巨仁

潺湲面江海澆漭曠波瀾不惜黃金餌唯憐翡翠竿斜

綸控急水定檝下飛湍潭迥風來易川長霧歇難寄言
朝市客滄浪徒自安

又

沈佺期

朝日歛紅煙垂竿向綠川人疑天上坐魚似鏡中懸避
檝時驚透猜釣每誤牽漁危不理轄潭靜欲畱船釣玉
君徒尚徵金我未賢為看芳餌下貪得會無全

擢歌

梁簡文帝

妾家住湘川菱歌本自便風生解刺浪水深能捉船葉
亂由牽荇絲飄為折蓮濺妝疑薄汗霑衣似故湔浣沙
流暫濁沈錦色還鮮參同趙飛燕借問李延年從來入

絃管誰在擢歌前

又

盧思道

秋江見底清越女復傾城
方舟共採摘最得可憐名
落花流寶珥微吹動香纓
帶垂連理濕擢舉木蘭輕
順風傳細語因波寄遠情
誰能結錦纜薄暮隱長汀

又

駱賓王

寫月圖黃罷凌波拾翠通
鏡花搖芰日衣麝入荷風
葉密舟難蕩蓮踈浦易空
鳳媒羞自托鴛翼恨難窮
秋帳燈花翠倡樓粉色紅
相思無別曲併在棹歌中

又

徐堅

棹女飾銀鈎新粧下翠樓
霜絲青桂檝蘭拽紫霞舟
水落金陵曙風起洞庭秋
扣船過曲浦飛帆越回流
影入桃花浪香飄杜若洲
洲長殊未返蕭散雲霞晚
日下大江平煙生歸岸遠
岸遠聞潮波爭途遊戲多
因聲趙津女來聽採菱歌

桂檝泛河中

沈君攸

黃河曲渚通千里濁水分流引八川
仙查逐源終未極蘇亭遺迹尚難遷
耿耿雲根侵遠樹蒼蒼水氣雜遙天
波影雜霞無定色湍文觸岸不成圓
赤馬青龍交出浦飛雲益海遠
凌煙蓮舟渡沙轉不礙桂檝距浪弱難前

風急金烏翅自轉汀長錦纜影微懸榜人欲歌先扣柁
津吏猶醉疆持船河隄極望今如此行杯落葉詎虛傳

神仙篇

戴嵩

徒聞石為火未見坂停丸暫數盈虛月長隨晝夜瀾辭
家試學道逢師得姓韓閩山金靜室蓬丘銀露壇安平
醞仙酒渤海轉神丹初飛喜退鳳新學法乘鸞十芒生
月腦六醖起星肝流瓊播疑俗信玉類陽官玄都宴晚
集紫府事朝看謝手今為別遙憐此俗難

又

張正見

瀛洲分渤澥閩苑隔虹蜺欲識三山路須尋千仞蹊石

梁雲外去蓬丘霧裏迷年深毀丹灶學久棄青泥葛水
流還杖天衢鳴去雞六龍驤首起雲閣萬里一別何寡
廓玄都府內駕青牛紫蓋山中乘白鶴潯陽杏花終難
朽武陵桃花未曾落已見玉女笑投壺復睹仙童欣六
博同甘玉文棗俱飲流霞藥鸞歌鳳舞集天台金闕銀
宮相向開西王已令青鳥去東海還馭赤虬來魏武還
車逢漢女荆王因夢識陽臺鳳蓋隨雲聊蔽日霓裳雜
雨復乘雷神嶽吹笙遙謝手當知福地有神才

又

盧思道

浮生猷危促名嶽共招携雲軒遊紫府風駟上丹梯時

見遼東鶴屢聽淮南雞玉英持作寶瓊實採成蹊飛策
揚輕電懸旌耀綵蜺瑞銀光似燭靈石髓如泥寥廓鸞
山右超越鳳洲西一丸應五色持此救人迷

又

魯范

王遠尋仙至藥已訪術迴乘空向紫府控鶴下蓬萊霜
分白鹿駕日映流霞杯煎金丹未熟醒酒藥初開乍應
觀海變誰肯畏年頽

升天行

盧思道

尋師得道訣輕舉厭人羣玉山候王母珠庭謁老君煎
為返魂藥刻作長生文飛策乘流雷雕軒曳白雲玄洲

望不極赤野眺無垠金樓旦巉嶮玉樹曉氛氲擁琴瑟
可望吹笙遠詎聞不學蜉蝣子生死何紛紛

步虛詞六首

庾信

渾成空教立元始正塗開赤玉靈文下朱陵真氣來中
天九龍館倒影八風臺雲度絃歌響星移空殿迴青衣
上少室童子向蓬萊逍遙聞四會倏忽度三災

其二

無名萬物始有道百靈初寂絕成丹氣玄冥上玉虛三
元隨建節八景逐迴輿赤鳳來銜璽青鳥入獻書壞机
仍成机枯魚還作魚棲心浴日館行樂止雲墟

其三

凝真天地表絕想寂寥前有象猶虛豁忘形本自然開
經壬子歲值道甲申年迴雲隨舞曲流水逐歌絃石髓
香如飯芝房脆似蓮停鸞宴瑤水歸路上鳴天

其四

東明九芝蓋北屬五雲車飄颻入倒景出沒上煙霞春
泉下玉溜青鳥向金華漢帝看桃核齊侯問棗花上元
應送酒來向蔡經家

其五

歸心遊太極回向入無名五香芬紫府千燈照赤城鳳

林採珠寶春山種玉榮夏笛三山響春鍾九乳鳴絳河
應遠別黃鶴來相迎

其六

麟洲一海濶玄圃半天高浮丘迎子晉若士避盧敖經
飡林慮李舊食綏山桃成丹瀆竹節刻石用蘆刀無妨
隱士去即是賢人逃

又

隋湯帝

洞府凝玄液靈山體自然俯臨滄海島回出大羅天八
行分寶樹十文散芳蓮懸居燭日月天步役風煙躡記
書金簡乘空誦玉篇冠法二儀立佩帶五星連瓊軒

甘露瑜井挹膏泉南巢息雲馬東海戲桑田回旗遊八
極飛輪入九玄高蹈虛無外天地乃齊年

輕舉篇

王褒

天地能長久神仙壽不窮白玉東華檢方諸西嶽童俄
瞻少海北暫別扶桑東俯觀雲似蓋低望月如弓看棋
城邑改辭家墟巷空流珠餘舊竈種杏發新蓂酒釀瀛
洲玉劍鑄昆吾銅誰能攬六博還當訪井公

桃源行

王維

漁舟逐水愛山春兩岸桃花夾去津坐看紅樹不知遠
行盡青溪忽值人山口潛行始隈隩山開曠望旋平陸

遙看一處攢雲樹近入千家散花竹樵客初傳漢姓名
居人未改秦衣服居人共住武陵源還從物外起田園
月明松下房櫳靜日出雲中雞犬喧驚聞俗客爭來集
競引還家問都邑平明問巷掃花開薄暮漁樵乘水入
初因避世去人間更問神仙遂不還峽裏誰知有人事
世中遙望空雲山不疑靈境難聞見塵心未盡思鄉縣
出洞無論隔山水辭家終擬長遊行自謂經過舊不迷
安知峯壑今來變當時只記入山深清溪幾度到雲林
春來遍是桃花水不辨仙源何處尋

芳樹

丘遲

芳葉已漠漠嘉實復離離發景傍雲屋凝暉覆華池輕
蜂掇浮穎弱鳥隱深枝一朝容色茂千春長不移

又

張正見

竒樹舒春苑流芳入綺錢合歡分四照同心章萬年香
浮佳氣裏葉映綠雲前欲識楊雄賦金玉滿甘泉

又

顧野王

上林通建章雜樹遍林芳日影桃蹊色風吹梅徑香幽
山桂葉落馳道柳條長折榮疑路遠用表莫相忘

又

盧照鄰

芳樹本多竒年華復在斯結翠成新幄開紅滿舊枝風

歸花歷亂日度影參差容色朝朝落思君君不知

又

沈佺期

何地早芳菲宛在長門殿天桃色若綬穠李光如練啼
鳥弄花踈遊蜂飲香遍歎息春風起飄零君不見

又

徐彥伯

玉花玼簾上金縷畫屏開曉月憐箏柱春風憶鏡臺箏
柱春風吹曉月芳樹落花朝暝歇藁砧刀頭未有時攀
條拭淚坐相思

玉樹後庭花

陳後主

麗宇芳林對高閣新粧艷質本傾城映戶凝嬌乍不進

出帷含態笑相迎
妖姬臉似花
含露玉樹流光照
後庭
棗下何纂纂二首
王胄

柳黃知節變
草綠識春歸
復道含雲影
重簷照日輝

其二

御柳長條翠
宮槐細葉開
還得聞春曲
便逐鳥聲來

採桑

吳均

賤妾思不堪
採桑渭城南
帶減連枝繡
髮亂鳳凰簪
花舞依長薄
蛾飛愛綠潭
無由報君信
流涕向春蠶

又

劉邈

倡妾不勝愁
結束下青樓
逐伴西城路
相携南陌頭
葉

盡時移樹枝
高任易鉤
絲繩提且脫
金籠寫仍收
蠶饑
日欲暮誰為使君畱

又

傅縡

羅敷試採桑
出入城南旁
綺裙映珠珥
絲繩提玉筐
度身攀葉聚
聳腕及枝長
空勞使君問
自有侍中郎

折楊柳

梁元帝

山高巫峽長
垂柳復垂楊
同心且同折
故人懷故鄉
山似蓮花艷
流如明月光
寒夜猿聲徹
遊子淚沾裳

又

柳惲

楊柳亂成絲
攀折上春時
葉密鳥飛礙
風輕花落遲
城

高短簫發林空畫角悲曲中別無意併是為相思

又

陳後主

楊柳動春情倡園妾屢驚入樓含粉色依風雜管聲武
昌識新種官渡有殘生還將出塞曲仍共胡笳鳴

又

徐陵

嫋嫋河堤樹依依魏主營江陵有舊曲洛下作新聲妾
對長楊苑君登高柳城春還應共見蕩子太無情

又

岑敬之

將軍始見知細柳繞營垂懸絲拂城轉飛絮上官吹塞
門交度葉谷口暗橫枝曲成攀折處唯言怨別離

又

江總

萬里音塵絕千條楊柳結不悟倡園花遙同故嶺雪春
心自浩蕩春樹聊攀折共此依依情無柰年年別

又

韋承慶

萬里邊城地三陽楊柳節葉似鏡中眉花如關外雪征
人遠鄉思倡婦高樓別不忍擲年華含情寄攀折

又

楊炯

邊地迷無極征人去不還秋容調翠羽別淚損紅顏望
斷流星驛心馳明月關藁砧何處在楊柳自堪攀

又

盧照鄰

倡樓啓曙扉園柳正依依鳥鳴知歲隔條變識春歸露
葉凝啼臉風花亂舞衣攀折聊將寄軍中書信稀

又

鄭愔

青柳映紅顏黃雲蔽紫關傳聞邊信出枝葉為君攀舞
態愁欲斷春心望不還風花亂成雪羅綺淚班班

又

崔湜

二月風光半三邊戍不還年華妾自惜楊柳為君攀落
絮緣衫袖垂條拂髻鬟那堪音信斷流涕望陽關

又

劉憲

沙塞三河道金閨二月春碧煙楊柳色紅粉綺羅人露

憐啼臉風花思舞巾攀持君不見為聽曲中新

又

張九齡

纖纖折楊柳持此寄情人一枝何足貴憐是故園春

又

李白

垂楊拂綠水搖豔東風年花明玉關雪葉暖金窻煙美
人結長恨相對心悵然攀條折春色遠寄龍庭前

又

歐陽瑾

垂柳拂粧臺葳蕤葉半開年華枝上見邊思曲中來嫩
色宜新雨輕花半落梅朝朝倦攀折征戍幾時回

梅花落

吳均

終冬十二月寒風西北吹獨有梅花落飄蕩不依枝流
連逐霜絲散漫下冰澌何當與春日共映芙蓉池

又

張正見

芳樹映紅野發早覺寒侵落遠香風急飛多花逕深周
人歎初標魏帝指前林邊城少灌木折此自悲吟

又

徐陵

對戶一株梅新花落故栽燕拾還蓮井風吹上鏡臺倡
家怨思妾樓上獨徘徊啼看竹葉錦葵罷未成裁

又

蘇子卿

中庭一樹梅寒多葉未開祇言花似雪不悟有香來上

郡春恒晚高樓年易催織書偏有意教逐錦文回

又二首

江總

胡地少春來三年驚落梅偏疑粉蝶散乍似雪花開可
憐香氣歇可惜風相摧金鏡且莫韻玉笛幸徘徊

其二

臘月正月早驚春眾花未發梅花新可憐芬芳臨玉臺
朝攀晚折還復開長安少年多輕薄兩兩常唱梅花落
滿酌金卮催玉柱落梅樹下宜歌舞金谷萬株連綺甍
梅花密處藏嬌鶯桃李佳人欲相照摘葉牽花來並笑
楊柳條青樓上輕梅花色白雪中明橫笛短簫淒復咽

誰知栢梁聲不絕

又

楊炯

窻外一株梅寒花五出開影隨朝日遠香逐便風來泣
對銅鈎障愁看玉鏡臺行人斷消息春恨幾徘徊

又

盧照鄰

梅嶺花初發天山雪未開雪處疑花滿花邊似雪回因
風入舞袖雜粉向粧臺匈奴幾萬里春至不知來

採蓮曲

梁簡文帝

晚日照空磯採蓮承晚暉風起湖南度蓮多摘未稀棹
動芙蓉落船移白鷺飛荷絲旁繞腕菱角遠牽衣

又

劉孝威

金槳木蘭船戲採江南蓮蓮香隔浦度荷葉滿江鮮房
垂易入手柄曲自臨盤露花時濕劍風莖乍拂鈿

又

沈君攸

平川映曉霞蓮舟泛浪華衣香隨岸遠荷影向流斜度
手牽長柄轉楫避踈花還船不畏滿歸路詎嫌賒

又

徐彥伯

妾家越水邊搖艇入江煙既見同心侶復採同心蓮折
藕絲能脆闌花葉正圓春歌弄明月歸棹落花前

又

賀知章

稽山罷霧鬱嵯峨鏡水無風也自波莫言春度芳菲盡
別有中流採芰荷

又

李白

若耶溪旁採蓮女笑隔荷花共人語日照新粧水底明
風飄香袖空中舉岸上誰家遊冶郎三三五五映垂楊
紫驪嘶入落花去見此踟躕空斷腸

又二首

王昌齡

吳姬越豔楚王妃爭弄蓮舟水濕衣時來浦口花迎入
採罷江頭月送歸

其二

荷葉羅裙一色裁芙蓉向臉兩邊開亂入池中看不見
聞歌始覺有人來

採菱歌

費昶

妾家五湖口採菱五湖側玉面不關粧雙眉本翠色日
斜天欲暮風生浪未息宛在水中央空作兩相憶

飛來雙白鶴

梁元帝

飛來雙白鶴奮翼遠凌煙雙棲集紫蓋一舉背青田颺
影過伊洛流聲入管絃鳴羣倒影外刷羽閩風前映海
疑浮雪拂澗瀉飛泉燕雀寧知去蜉蝣不識還何言別
儔侶從此間山川顧步已相失徘徊反自憐危心猶驚

露哀響詎聞天無因振六翮輕舉復隨仙

又

劉孝綽

鷓絃且輟弄鶴噪暫停微別有啼鳥曲東西相背飛倡
入怨獨守蕩子遊未歸忽聞生離曲長夜泣羅衣

獨鶴凌雲去

劉那

孤鳴思滄海矯翮避虞機怨別棲琴曲凌風散舞衣五
里雖迴顧千年會欲歸寄語雷門鼓無復一雙飛

黃鵠一遠別

阮卓

霜風秋月映樓明寡鶴偏棲中夜驚月下徘徊顧別影
風前樓斷送離聲離聲一去斷還續別響時來踈復促

聊看遠客贈綾紋彌怨閑宵雅琴曲恒思昔日稻梁恩
理翮整翰上君軒獨舞輕飛向吳市孤鳴清淚出雷門
王子吹笙忽相值自覺飄飄雲裏駛一舉千里未能歸
唯有田饒解深意

烏棲曲三首

梁元帝

幄中清酒瑪瑙鍾裙邊雜佩琥珀龍虛持寄君心不惜
共指三星今何夕

其二

沙棠作船桂為楫夜度江南採蓮葉復值西施新沈沙
共向江竿眺月華

其三

蛟龍成錦鬪鳳紋芙蓉為帶石榴裙日下城南兩相望
月沒參橫掩羅帳

雙燕離

梁簡文帝

雙燕有雄雌照日兩差池銜花落北戶逐蝶上南枝桂
棟本曾宿虹梁早自窺願得長如此無令雙燕離

鬪雞

梁簡文帝

歡樂良無已東郊春可遊百花非一色新田多異流龍
尾橫津漢車箱赴戍樓玉冠初警敵芥羽忽猜傳十日
驕既滿九勝勢恒道脫使田饒見堪能說魯侯

又

劉孝威

丹雞翠翼張妬敵復專場翅中含芥粉距外耀金芒氣
踰上黨列名媿下韞良祭橋愁魏后食距忌齊王願賜
淮南藥一使雲間翔

又

徐陵

季子聊為戲陳王欲騁才花冠已衝力金爪復驚媒聞
鳳羞衣錦雙鸞恥鏡臺陳倉若有信為覓寶雞來

又

褚玠

春郊鬪雞侶捧敵兩逢迎詭羣排袖出帶勇向場驚錦
毛侵距散芥羽雜塵生還同戰勝罷取介寄前鳴

又

毛處約

春物始芳菲春雉正相追
澗響連朝雉花光帶錦衣
竄跡時移影驚媒或亂飛
能使如臯路相逢巧笑歸

朱鷺

王僧孺

因風弄玉水映日上金堤
猶持畏羅繳未得異鳥驚
聞君愛白雉兼因重碧雞
未能聲似鳳聊變色如珪
願識昆明路乘流飲復棲

又

裴憲伯

秋來懼寒勁歲去畏冰堅
羣飛向葭下奮羽欲南遷
暫戲龍池側時往鳳樓前
所嘆恩光歇不得又聯翩

又

張正見

金堤有朱鷺刷羽望滄瀛
周詩振雅曲漢鼓發奇聲
時將赤鴈並乍逐絲鷺行
別有翻潮處異色不相驚

東飛伯勞歌

劉孝威

雙棲翡翠兩鴛鴦巫雲洛月乍相望
誰家妖冶折花枝衫長劍動任風吹
金鋪玉鎖琉璃扉花鈿寶鏡織成衣
美人年幾可十餘含羞騁笑歛風裾
珠丸出彈不可追空畱可憐持與誰

又

陳後主

池側鴛鴦春日鶯綠珠絳樹相逢迎
誰家佳麗過淇上

翠釵綺袖波中漾，雕軒繡戶花恒發。珠簾玉砌移明月，
年時二七猶未笄。轉顧流盼鬢鬢低，風飛蕊落將何故。
可惜可憐空擲度。

又

江揔

南飛烏鵲北飛鴻，弄玉蘭香時會同。誰家可憐出窻牖，
春心百媚勝楊柳。銀牀金屋挂流蘇，寶鏡玉釵橫珊瑚。
年時二八新紅臉，宜笑宜歌羞更斂。風花一去杳不歸，
祇為無雙惜舞衣。

又

辛德源

合歡芳樹連理枝，荆王神女乍相隨。誰家妖艷蕩輕舟，
含嬌轉盼騁風流。犀棹蘭橈翠羽蓋，雲羅霧縠蓮花帶。
女兒年幾十六七，玉面新粧映朝日。落花從風俄度春，
空畱可憐何處新。

又

張東之

青田白鶴丹山鳳，婺女姮娥兩相送。誰家絕世綺帳前，
艷粉芳脂映寶鈿。窈窕玉堂褰翠幙，參差繡戶懸珠箔。
絕世三五愛紅粧，冶袖長裙蘭麝香。春去花枝俄易改，
可歎年光不相待。

又

李嶠

傳書青鳥迎簫鳳，巫嶺荆臺數通夢。誰家窈窕住園樓，

五馬千金照陌頭，羅裙玉珮當軒出。
點翠施紅競春日，佳人二八咸舞歌。
羞將百萬呈雙蛾，庭前芳樹朝夕改。
空駐年華欲誰待。

野田黃雀行

蕭愨

弱軀媿絲飾，輕毛非錦文。
不知鴻鵠志，非是鳳凰羣。
作風隨濁雨，入曲應玄雲。
空城舊侶絕，滄海故交分。
寧死明珠彈，且避鷹將軍。

天馬辭二首

張仲素

天馬初從渥水來，歌曾唱得渥龍媒。
不知玉塞沙中路，首着殘花幾處開。

其二

躩蹠宛駒齒未齊，縱金噴玉向風嘶。
來時行盡金河道，獵獵輕風在碧蹄。

君馬黃二首

張正見

幽并重騎射，征馬正盤桓。
風去長嘶遠，冰堅度足寒。
出關聊變色，上坂屢停鞍。
即今隨御史，非復在樓蘭。

其二

五色乘馬黃，追風時滅沒。
血汗染龍花，胡鞍抱秋月。
唯騰渥洼水，不飲長城窟。
詎待燕昭王，千金市駿骨。

又

蔡知君

君馬經西極，臣馬出東方。策盡浮雲影，珂連明月光。水凍恒傷骨，蹄寒為踐霜。躊躇嗟伏檻，空想欲從良。

紫驪馬

梁元帝

長安美少年，金絡錦連錢。宛轉青絲鞵，照耀珊瑚鞭。依槐復依柳，躑躅復隨前。方逐幽并去，西北共連翩。

又

陳後主

嫋姚紫塞歸，躑躅紅塵飛。玉珂鳴廣路，金絡耀晨輝。蓋轉時移影，香動屢驚衣。禁門猶未閉，連騎莫相違。

又

徐陵

玉鐙繡纏鬃，金鞍錦覆幪。風驚塵未起，草淺埒猶空。角

穿兩兔珠，彈落雙鴻日。斜馳逐罷連，翩還上東

又

祖孫登

候騎指樓蘭，長城迫路難。嘶從風處斷，骨住水中寒。飛塵暗金勒，落淚灑銀鞍。抽鞭上關路，誰念客衣單。

又

陳暄

天馬汗如虹，鳴鞭度九竅。飲傷城下凍，嘶依北地風。笳寒芳樹歇，笛怨柳枝空。橫行意未已，羞往轂車中。

又

李燮

紫燕忽踟躕，紅塵起路隅。園人移首看，騎士逐塵蕪。三邊追黠虜，一鼓定強胡。安用珂為玉，自有汗成珠。

又

獨孤嗣宗

倡樓望早春寶馬度城闈照耀桃花徑蹀躞採桑津金
羈麗初景玉勒染輕塵遠聽珂驚急猶是畫眉人

又

江摠

春草正萋萋蕩婦出空閨識是東方騎猶帶北風嘶揚
鞭向柳市細蹀上金堤願君憐織素殘粧尚自啼

又

楊炯

俠客重周遊金鞭控紫驪蛇弓白羽箭鶴纒赤茸秋發
跡來南海長鳴向北州匈奴今未滅畫地取封侯

又

盧照鄰

驪馬照金鞍轉戰入臯蘭塞門風稍急長城水正寒雪
暗鳴珂重山長噴玉難不辭橫絕漠流血幾時乾

又

沈佺期

青玉紫驪鞍驕多影屢盤荷君能翦拂躑躅噴桑乾
足追奔易長鳴遇賞難從今一萬里霜露不辭寒

又

李白

紫驪行且嘶雙翻碧玉蹄臨流不肯渡似惜錦障泥白
雪關城遠黃雲海樹迷揮鞭萬里去安得念春閨

驄馬

江摠

長城兵氣寒飲馬詎為難暫解青絲纒行歇鑊櫛鞍白

登圍轉急黃河凍不乾萬里朝飛電論功易走丸

又

王由禮

善馬金羈飾躡影復凌空影入長城水聲隨胡地風控
歛青門外珂喧紫陌中行行苦不倦唯當御史驄

又

楊炯

驄馬鐵連錢長安俠少年帝畿平若水官路直如弦夜
玉裝車軸秋金鑄馬鞭風霜但自保窮達任皇天

又

沈佺期

西北五花驄來時道向東四蹄碧玉片雙眼黃金瞳鞍
上雷明月嘶間動朔風借君馳沛艾一戰取雲中

白馬篇

孔稚圭

白馬金具裝橫行遼水旁問是誰家子宿衛羽林郎文
犀六屬鎧寶劍七星光山虛弓響徹地迥角聲長宛河
推勇氣隴蜀擅威強輪臺受降虜高闕翦名王射熊入
飛觀校獵下長楊英名欺衛霍智策茂平良島夷時失
禮卉服犯邊疆微兵離薊北輕騎出漁陽集軍隨日暈
挑戰逐星芒陣移龍勢動營開虎翼張衝冠入死地攘
臂越金湯塵飛戰鼓急風交征旆揚轉聞平華地追奔
掃帶方本持身許國况復武功彰會今千載後流譽滿
旂常

又

徐悱

研蹄飾鏤鞍飛鞚度河干少年本上郡遨遊入露寒劍
琢荆山玉彈把隋珠丸聞有邊風急飛候至長安然諾
竊自許捐軀諒不難占兵出細柳轉戰向樓蘭雄名盛
李霍壯氣勇彭韓能令石飲羽復使髮衝冠要功非汗
馬報効乃鋒端日沒塞雲起風悲胡地寒西征馘小月
北去腦烏丸歸報明天子燕然石復刊

又

王胄

白馬黃金鞍躑躅柳城前問此何鄉客長安惡少年結
髮從戎事馳名振朔邊良弓控繁弱利劍揮龍泉披林

扼雕虎仰手接飛鳶前年破沙漠昔歲取祁連折衝摧
右校舉旗殪左賢虎彌還謝力慶忌本推僇海外平遐
險來庭識負褰三韓勞薄伐六事指幽燕良家選河右
猛將征西山浮雲屯羽騎蔽日引長旃自矜有餘勇應
募忽爭先王師已得僦夷首失求全鼓行徇玉檢乘勝
蕩朝鮮志勇期功立寧憚微軀捐不羨山河賞唯希竹
素傳

又

王褒

北走長安道征騎每經過戰垣臨八陣旌門對兩和屯
兵戍隴北飲馬傍城阿雪深無復道冰合不生波塵飛

連陣聚沙平騎迹多昏昏隴坻月耿耿霧中河羽林猶
角觝將軍尚雅歌臨戎常拔劍象險屢提戈秋風鳴馬
首薄暮欲如何

又

唐太宗

塞外悲風切交河冰已結瀚海百重波陰山千里雪迴
戍危烽火層巒引高節悠悠卷旆旌飲馬出長城寒沙
連騎迹朔吹斷邊聲胡塵清玉塞羌笛韻金鉦絕漠干
戈戢車徒振原隰都尉反龍堆將軍旋馬邑揚麾氛霧
靜紀石功名立荒裔一戎衣靈臺凱歌入

又

王翰

長安少年無遠圖一生唯羨執金吾麒麟殿前拜天子
走馬為君西擊胡胡沙獵獵吹人面漢虜相逢不相見
遙聞鞞鼓動地來傳聞單于夜猶戰此時顧恩寧顧身
為君一行推萬人壯士揮戈回白日單于濺血染朱輪
回來飲馬長城窟長城道旁多白骨問之耆老何代人
云是秦王築城卒黃昏塞北無人煙鬼哭啾啾聲沸天
無罪見誅功不賞孤魂流落此城邊當昔秦王按劍起
諸侯膝行不敢視富國疆兵二十年築怨興徭九千里
秦王築城何太愚天實亡秦非北胡一朝禍起蕭牆內
渭水咸陽不復都

愛妾換馬

梁簡文帝

功名幸多種何事苦生離誰言似白玉定是媿青驪必
取匣中劍迴作飾金羈真成恨不已願得路傍兒

又

劉孝威

驄馬出樓蘭一步九盤桓小史贖金絡良工送玉鞍龍
驂來甚易烏孫去實難麟膠妾猶有請為急弦彈

又

庾肩吾

渥水出騰駒湘川實應圖來從西北道去逐東南隅琴
聲應玉匣山路泣靡蕪似鹿將含笑千金會不俱
苑詩類選卷之十四

詩類選卷之十五

明監察御史包節輯按察司知事前給事中王交校

音樂部

樂 鍾 琴 箏 笙 琵琶 笛
簾 策 歌 舞 妓

○觀樂應詔

王暕

趙瑟含清音秦箏凝逸響參差陳九夏依遲紛四上從
風繞金梁含雲映珠網遞奏豐二八繁絃非一兩幸叨
東郭吹厠陪南風賞忘味信鏗鏘冷和終俯仰輕塵已
飛散游魚亦翻蕩恩光實難遇詠言寧易放

奉和月夜聽軍樂應詔

薛道衡

旌門臨古堞徼道度深隍月冷凝秋夜山寒落夏霜遙

空澄暮色清景散餘光笳聲喧隴水鼓曲噪漁陽沈鬱
興神思眇聽發天章嵩岱終難學丘陵徒自強

於太常寺聽陳國蔡于元所校正聲樂

許善心

維陽盛禮樂治定昔君臨克庭觀樹羽上帝仰撻金既
因鍾石變將隨河海沈湛露廢還序乘風絕復尋哀章
無舊跡韶夏有餘音澤竭英莖散人遺憂思深悲來未
減瑟淚下正聞琴詎似文侯睡聊同微子吟鍾奏殊南
北商聲異古今獨有延州聽應知亡國音

觀太常奏新樂

孔德紹

大君膺寶曆出豫表功成鈞天金石響洞庭弦管清八
音動繁會九變叶希聲和雲留睿賞薰風悅聖情盛烈
光韶濩易俗邁咸英竊吹哀無取率舞抃輕生

又

卞斌一作孫萬壽

昔人夢上帝尚喜頌鈞天况茲開景業作樂武功宣大
雅廢還理乘風毀更懸中和誠易擬韶夏詎相沿捷為
一作濱磬響徹嶰谷管聲傳小臣濫清耳長奉南風弦

奉勅於太常寺脩正古樂 何妥

大樂遺鍾鼓至樂貴忘情俗久淳和變年深禮教生嶰
谷調孤管嶠山學鳳鳴浮雲成舞曲白雪作歌名聞詩

六義辯觀漏八風平肅穆皇威暢淪漣河水清鈞天動
絲竹括地響錚鉦盡美兼韶濩盛德摠咸英寥亮鳧鍾
徹飄揚翟羽輕小臣屬千載時幸預簪纓行欣負蒼璧
衢壇聽九成

樂部曹觀樂

前人

東海餘風大陶唐遺思深何如觀徧舞奏鼓間擬金清
管調絲竹朱絃韻雅琴八行陳樹羽六德審知音至道
兼韶濩克庭摠赫任高天度流火落日廣城陰百神諧
景福萬國仰君臨大樂非鍾鼓且用戒民心

三層閣上置音聲

唐太宗

綺筵移暮景紫閣引宵烟隔棟歌塵合分階舞影連聲
流三處管響扎一重絃不似秦樓上吹簫空學僊以上樂

○日晚彈琴

馬元熙

上客敞前扉鳴琴對晚暉掩抑歌張女淒清奏楚妃稍
視紅塵落漸覺白雲飛新聲獨見賞莫恨知音稀

賦得為我彈鳴琴

沈炯

為我彈清琴琴鳴傷我襟半死無人覺入竈始知音空
為貞女引誰達楚妃心雍門何假說落淚自滛滛

又

賀澈

薄暮高堂上調琴召美人伯喈聲未盡相如曲復新點

音集部
卷五
徽還轉弄亂爪更留賓聊持一絃響雜起艷歌塵

詠琴

江揔

可憐嶧陽木雕爲綠綺琴田文垂睫淚卓女弄絃心戲
鶴聞應舞游魚聽不沉楚妃幸勿歎此異丘中吟

聽琴

蕭愨

洞門涼氣滿閑管夕陰生絃隨流水急調雜秋風清掩
抑朝飛弄淒斷夜啼聲至人齊物我持此悅高情

詠鄰女樓上彈琴

吳尚野

青樓誰家女開牕弄碧弦貌同朝日麗裝競午花然一
彈哀塞鴈再撫哭春鶻此情人不會東風千里傳

賦得坐彈鳴琴

楊希道

北林鵲夜飛南軒日斜進調絃發清徽蕩心怯福愒變
作離鴻聲還入思歸引長嘆未終極秋風飄素鬢

詠琴

前人

久擅龍門質孤竦嶧陽名齊娥初發弄趙女正調聲嘉
客勿遽反繁絃曲未成

又

劉允濟

昔在龍門側誰想鳳鳴時雕琢今爲器官商不自持已
人緩踈節楚客弄繁絲欲作高張引翻成下調悲

夏彈琴

劉希夷

音學部
卷十五
四
碧山本岑寂素絲何清幽彈爲風入松崖谷颯已秋庭
鶴舞白雪泉魚躍洪流余欲娛世人明月難暗投感歎
未終曲淚下不可收嗚呼鍾子期零落歸山丘死而若
有知菟兮隨我游

琴

李嶠

隱士竹林隈英聲寶匣開風前綠綺弄月下白雲來淮
海曾爲室梁岷舊作臺子期如可聽山水響餘哀

又

王昌齡

孤桐秘虛鳴朴素傳幽貞髮髯絃指外遂見古初人意
遠風雪苦時來江山春高宴未終曲誰能辯經綸

秋夕聽羅山人彈三峽流泉

岑參

皤皤峨山老抱琴鬢蒼然衫袖拂玉徽爲彈三峽泉此
曲彈未半高唐如空山石林何颼颼忽在窓戶間纖指
弄嗚咽清絲激潺湲演漾怨楚雲虛徐韻秋烟疑兼陽
臺雨似雜巫山猿幽引鬼神聽靜令耳目便楚客腸欲
斷湘妃淚班班誰裁青桐枝絙以朱絲弦能令古人曲
遞與今人傳知音難再逢偕君方老年曲終月已落惆
悵東齋眠以上
琴

○詠箏

沈約

秦箏吐絕調玉柱揚清曲絃依高張斷聲隨妙指續徒
聞音繞梁寧知顏如玉

又

王臺卿

依歌時轉韻按曲動花鈿促調移輕柱亂手度繁絃唯
有高秋月秦聲獨可憐

玄圃宴合詠一物得箏

陸瓊

三五并時年二八共來前今逢泗濱樹定減琴中絃鶴
別霜初緊烏啼月正懸

聽箏

張九齡

端居正無緒那復發秦箏纖指傳新音繁絃起怨情悠

揚思欲絕掩抑態還生豈是聲能感人心自不平

贈彈箏人

溫庭筠

天寶年中事玉皇曾將新曲教寧王鈿蟬金鳳皆零落

一曲伊州淚萬行

以上
箏

○詠箏

陸罕

管清羅袖拂響合絳唇吹含情應節轉逸態逐聲移所
美周王子弄羽一參差

又

楊希道

短長插鳳翼洪細摹鸞音能令楚妃嘆復使荆王吟切
切孤竹管來應雲和琴

以上
箏

○詠琵琶

王融

抱月如可明懷風殊復清
絲中傳意緒花裏寄春情
掩抑有奇態淒鏘多好聲
芳袖幸持拂龍門空自生

又

唐太宗

半月無雙影金花有四時
摧藏千里態掩抑幾重悲
促節繁紅袖清音滿翠帷
惟馭彈風響急緩曲劍聲
遲空餘關隴恨因此代相思

聽隣人琵琶

陳叔達

本自龍門祠因妍入漢宮
香由羅袖裏聲逐朱絃中
雖有相思韻翻將入塞同
關山臨却月花蕊散迴風
為將

金谷引添令曲未終

鄂渚聽杜別駕彈胡琴

劉長卿

文姬留此曲千載一知音
不解胡兒語空愁楚客心
聲隨邊草動意入隴雲深
何事長江上瀟瀟出塞吟

以上琵琶

○賦得長笛吐清氣

周弘讓

商聲傳後出龍吟鬱前吐情斷
山陽含氣咽平陽塢胡騎爭北
歸偏知引鄉苦羈旅情易傷零
淚如交雨

又

賀澈

胡關氛霧侵羗笛吐清音韻切
山陽曲聲悲隴上吟柳拆城邊
樹梅舒嶺外林方知出塞虜不
憚武溪深

詠笛

劉孝孫

涼秋夜笛鳴流風韻九成調高時慷慨曲變或淒清征
客懷離緒隣人思舊情幸以知音顧千載有奇聲

又

宋之問

羗笛寫龍聲長吟入夜清關山孤月下來向隴頭鳴逐
吹梅花落含春柳色驚行觀向子賦坐憶舊隣情

與庾郎中飲聽黃鶴樓吹笛

李白

一為遷客去長沙西望長安不見家黃鶴樓中吹玉笛
江城五月落梅花

觀胡人吹笛

前人

胡人吹玉笛一半是秦聲十月吳山曉梅花落敬亭愁
聞出塞曲淚滿逐臣纓却望長安道空懷戀主情

江上聞笛

王昌齡

橫笛怨江月扁舟何處尋聲長楚山外曲繞胡關深相
去萬餘里遙傳此夜心寥寥浦嶼寒響盡唯幽林不知
誰家子復奏邯鄲音水客皆擁棹空霜遂盈襟疲馬頭
北走遷人悲越吟何當邊草白旌節隴城陰

塞上聽吹笛

高適

雪淨胡天牧馬還月明羗笛戍樓澗借問梅花何處落

風吹一夜滿關山

聞笛

李益

回樂風前沙似雪受降城下月如霜不知何處吹蘆管
一夜征人盡望鄉

夜上受降城聞笛

前人一作

入夜思歸切笛聲寒更哀愁人不願聽自到枕前來風
起塞雲斷夜深關月開平明獨惆悵落盡一庭梅以上

○詠鍾

宋之問

既接南隣磬還隨北里笙平陵通曙響長樂徹宵聲秋
至含霜動春歸應律鳴豈惟恒待扣金簾有餘清以上

○夜聞箴篋

杜甫

夜聞箴篋滄江上衰年側耳情所向隣舟一聽多感傷
塞曲三更歛悲壯積雪飛霜此夜寒孤燈急管復風湍
君知天地干戈滿不見江湖行路難以上

○歌

李嶠

漢帝臨汾水周僊去洛濱郢中吟白雪梁上繞飛塵響
發行雲駐聲隨子夜新願君聽扣角當自識賢臣

夜上西城聽梁州曲

李益

行人夜上西城宿聽唱梁州雙管逐此時秋月滿關山
何處關山無此曲

與歌童田順郎

劉禹錫

天上能歌御史娘
花前月底奉君王
九重深處無人見
分付新聲與順郎

以上歌

○詠舞二首

梁簡文帝

可憐二八初逐節
似飛鴻懸勝河陽妓
閣與淮南同入
行看履進轉面望
鬟空腕動韶華玉
衫隨如意風上客
何須起啼烏曲未終

其二

戚里多妖麗
重娉茂燕餘
逐節工新舞
嬌態似凌虛
扇開衫影亂
巾度履行踈
徒勞交甫憶
自愧專城居

又

劉遵

倡女多艷色
入選盡華年
舉腕嫌衫重
迴腰覺態妍
情繞陽春吹
影逐相思絃
履度開裙襍
鬟轉落花鈿
所愁餘曲罷
為欲在君前

又

王謝

新粧本絕世
妙舞亦如僊
傾腰逐韻管
斂色聽張絃
袖輕風易入
釵重步難前
笑態千金動
衣香十里傳
持將比飛燕
定當誰可憐

又

楊皦

紅顏自燕趙
妙妓邁陽阿
就行齊逐唱
赴節閣相和
折

腰送餘曲歛袖待新歌
頻容生翠羽曼睇出橫波
雖稱趙飛燕比此詎成多

又

徐陵

十五屬平陽因來入建章
主家能教舞城中巧畫粧
低鬟向綺席舉袖拂花黃
燭送空邊影衫傳篋裏香
當筵好留客故作舞衣長

又

庾信

洞房花燭明燕餘雙舞輕
頻履隨踈節低鬟逐上聲
步轉行初進衫飄曲未成
鸞迴鏡欲滿鶴顧市應傾
已曾天上學詎是地中生
以上舞

○聽夜妓

梁簡文帝

合歡蠲忿葉萱草忘憂條
何如明月夜流風拂舞腰
朱唇隨吹動玉釧逐絃搖
留賓惜殘弄負態動餘嬌

夕出通波閣下觀妓

梁孝元帝

娥月漸成光燕姬戲小堂
胡舞開春閣鈴盤出步廊
起龍調節鼓却鳳點笙簧
樹交臨舞席荷生夾妓航
竹密無分影花疎有異香
捉盃持笑語歡茲樂未央

和林下作妓應令

同前

日斜下北閣高宴出南榮
歌清隨澗響舞影向池生
輕花亂粉色風篠雜絃聲
獨念陽臺下願待洛川笙

又

梁昭明太子

炎光向夕歛從宴臨前池泉將影相得花與面相宜箎
聲如鳥弄舞袖寫風枝歡樂不知醉千秋長若斯

同武陵王看妓

劉孝綽

燕姬奏妙舞鄭女發清歌迴羞出慢臉送態表頰娥寧
殊過行兩詎減見凌波想君愁日落應羨魯陽戈

夜聽妓賦得烏夜啼

前人

鶻絃且輟弄鶴操暫停揮別有啼烏曲東西相背飛倡
人怨獨守蕩子遊未歸若逢生離唱長夜泣羅衣

冬夜對妓

蕭放

佳麗盡時年合暝不能眠銀龍銜燭燼金鳳起爐煙吹
箎先弄曲調箏更撮絃歌還團扇後舞出妓行前絕代
終難及誰復數神僊

夜出妓

沈君攸

簾間月色度燭定妓成行迴身釧玉動頰履佩珠鳴低
衫拂鬟影舉扇起歌聲匣中曲猶奏掌上體應輕

司空宅詠妓

陰鏗

佳人遍綺席妙曲動鶻絃樓似陽臺上池如洛浦邊鶯
啼歌扇後花落舞衫前翠柳將斜日偏是晚粧鮮

又

劉珊

石家金谷妓粧罷出蘭閨看花只欲笑聞瑟不勝啼山
邊歌落日池上舞前溪將人當桃李何處不成蹊

和趙王看妓

庾信

綠珠歌扇薄飛燕舞衫長琴曲隨流水簫聲逐鳳凰細
縷纏鍾格圓花釘鼓床懸知曲不誤無事畏周郎

酬蕭侍中春園聽妓

李元操

微雨散芳菲中園照落暉紅樹搖歌扇綠珠飄舞衣繁
絃調對酒雜引動思歸愁人當此夕羞見落花飛

詠妓

陳子良

金谷多歡宴佳麗正芳菲流霞席上滿迴雪掌中飛明

月臨歌扇行雲接舞衣何必挑將李別有待春暉

又

何遜

管清羅薦合絃驚雪袖遲逐唱迴纖手聽曲轉娥眉凝
情眇墮珥微睇托含辭日暮留嘉客相看愛此時

和衡陽殿下高樓看妓

江揔

起樓侵碧漢初日照紅粧絃心艷卓女曲誤動周郎並
歌時轉黛息舞暫分香掛纓銀燭下莫笑玉釵長

夜聞隣妓

盧思道

倡樓對三道吹臺臨九重笙隨山上鶴笛奏水中龍怨
歌聲易斷妙舞能難逢誰能暫留客解佩一相從

和許給事善心戲場轉韻 薛道衡

京洛重新年復屬月輪圓雲間壁獨轉空裏鏡孤懸萬
方皆集會百戲盡來前臨衢車不絕夾道閤相連驚鴻
出洛水翔鶴下伊川艷質迴風雪笙歌韻管絃佳麗儼
成行相携入戲場衣類何平叔人同張子房高高城裏
髻我我樓上粧羅裙飛孔雀綺席垂鴛鴦日映班姬扇
風飄韓壽香竟夕魚負燈徹夜龍銜燭歡笑無窮已歌
吹還相續羌笛隴頭吟胡舞龜茲曲假面飾金銀盛服
搖珠玉宵深戲未闌競爲人所謹卧馳飛玉勒立騎轉
銀鞍縱橫既躍劔揮霍復跳丸抑揚百獸舞盤珊五禽

戲俊猥弄班足巨象垂長鼻青羊跪復跳白馬迴旋騎
忽見羅浮起俄看鬱呂至峯嶺既崔嵬林叢亦青翠麋
鹿下騰倚猴援或蹲跂金徒列舊刻玉律動新灰甲莢
垂陌柳殘花散苑梅繁星漸寥落斜月尚徘徊王孫猶
勞戲公子未歸來共酌瓊蘇酒同傾鸚鵡杯普天逢聖
日兆庶喜康哉

衡陽王齋閣奏妓

虞茂

金溝低御道玉管正吟風拾翠天津上迴鸞鳥路中鏡
前看月近歌處覺塵空今宵織女見言是望僊宮

和平涼公觀趙郡王妓

弘執恭

小堂羅薦陳妙妓命燕秦翠眉疑假黛紅臉自含春合
舞俱迴雪分歌共落塵齊竿不可厠空頭上龍津

又

釋法宣

桂山留上客蘭室命媯妖城中畫眉黛宮內束纖腰舞
袖風前舉歌聲扇後驕周郎不相顧今日管絃調

詠妓

王勣

妖姬飾淨粧窈窕出蘭房日照當軒影風吹滿路香早
時歌扇薄今日舞衫長不應令曲誤持此試周郎

益州城西張超亭觀妓

盧照隣

落日明歌席行雲逐舞人江前飛暮雨梁上下輕塵冶

服看疑畫粧臺望似春高車勿遽返長袖欲相親

辛司法宅觀妓

前人

南國佳人至北堂羅薦開長裙隨鳳管促柱送鸞杯雲
光身後落雪態掌中回到愁金谷晚不恠玉山頽

天津橋上美人

駱賓王

美女出東隣容與在天津動衣香滿路移步襪生塵水
下看粧影眉頭畫月新寄言曹子建箇是洛川神

戲贈趙使君美人

杜審言

紅粉青娥映楚雲桃花馬上石榴裙羅敷獨向東方去
謾學他家作使君

在水軍宴常司馬樓船觀妓

李白

搖曳帆在空清流順歸風詩因鼓吹發酒為劍歌雄對
舞青樓妓雙鬟白玉童行雲且莫去留醉楚王宮

出妓金陵子呈盧六

前人

安石東山二十春傲然携妓出風塵樓中見有金陵子
何似陽臺雲雨人

五日觀妓

萬楚

西施漫道浣春紗碧玉今時鬪艷華眉黛奪將萱草色
紅裙妬殺石榴花新歌一曲令人艷醉舞雙眸斂鬢斜

誰道五絲能續命却令今日死君家

王家少婦

崔顥

十五嫁王昌盈盈入畫堂自矜年最少復倚嬌為郎舞
愛前溪綠歌憐子夜長閑來鬪百草度日不成粧

岐王席觀妓

前人

二月春來半王家日漸長柳垂金屋暖花發玉樓香拂
匣先臨鏡調笙更多簧長將歌舞態只擬奉君王

揚州雨中張十七宅觀妓

張謂

夜色帶寒烟燈花拂更然殘粧添石黛艷舞落金鈿掩
笑頻迴扇迎歌乍動絃不知巫峽雨何事海西邊

陪辛大夫西亭宴觀妓

劉長卿

歌舞憐遲日旌麾映早春鶯窺隴西將花對洛陽人醉罷知何事息深忘此身任他行雨去歸路裛輕塵

觀妓詠和舞

張諤

半額盡雙娥盈盈燭下歌玉盃寒意少金屋夜情多香艷王分帖裙驕勅賜羅平陽莫相妬喚出不如他以生

苑詩類選卷之十五終



音部

卷十五

十六

音部

